

論

語

詳

解

論語詳解卷三

郝敬解

八佾第三○爲政莫如禮樂此篇多言禮樂故八佾次爲政

孔子謂季氏八佾<sub>逸</sub>舞於庭是可忍也孰不可忍也  
先王制禮正上下辨名分豈能人人禁之使不犯唯  
人心各自有惻然不安者在所謂不忍之心禮樂之  
原也禮大夫判縣祭祀無樂季氏以諸侯之大夫焉  
得用天子舞目觀其數而安焉其心已死矣亂臣賊  
子彌天之罪皆生于忍忍則無不爲不可理諭不可

勢禁惟有提掇良心望其惻然猛省而已

季氏魯桓公庶子季友之後其與夫子同時者季桓子斯及其子康子肥也庭季氏家廟之庭堂下曰庭舞樂容也佾舞列也舞以合樂樂有音則有舞武舞千戚文舞羽籥以八爲節每列八人唯天子用全八八六十四人八數不可少而行列視貴賤增減各以兩諸侯六八四十八人大夫四八三十二人士二八十六人或云諸侯六佾六六三十六人大夫四佾四四十六人士二佾四人按春秋傳魯襄公十一年鄭伯賂晉悼公女樂二八以一八賜魏絳則是舞以八

爲列甚明也。魯公室用天子禮樂，自成王崇祀周公，始詳禮記明堂位。平王初年，魯惠公使人請郊禘，平王許之。至僖公朝，魯國富強，遂用禘，用郊。三望，春秋與魯頌可徵也。公羊傳云：昭公謂子家駒曰：「吾何僭哉？」答曰：「朱干玉戚以舞大夏，八佾以舞大武。」此天子之禮也。則魯用八佾，自公室先之。然亦非自昭公始。宣公朝，季孫行父爲政，請于周作魯頌，起廟樂，自以爲周公之孫，上祖天子，故三家效尤亦自以爲周公之裔，立桓公廟于私家，舞八佾。歌雍詩記云：「公庭之設于私家，非禮也。」以此左傳昭公二十五年將禘于

襄公萬者二人其衆萬于季氏然則季氏之舞八佾亦久矣亦非夫子時始也

三家者以雍徹子曰相維辟公天子穆穆奚取於三家之堂

大夫曰家三家魯大夫桓公後故又稱三桓桓公四子長莊公次仲慶曰孟氏次叔牙曰仲氏次季友曰季氏者分別之辭猶俗言這也雍周頌篇名天子大禘之樂歌首章曰有來雍雍至止肅肅相維辟公天子穆穆助祭曰相辟公諸侯也穆穆敬意三家祭畢徹俎歌此詩勿論僭越姑問其所謂辟公天子安在

于詩何取。橫逆之人難與言禮法。就其甚無謂者詰之。當自結舌。凡樂歌風雅有上下通用者。不必辭。皆似惟頌不可假。惟天子宗廟有頌。頌功德。諸侯廟樂賜之天子。無僭用天子樂之理。況大夫乎。魯自季文子請于周。作魯頌三家。所以效尤歌雍也。故夫子執辭討其狂。并以哂其愚。

子曰。人而不仁。如禮何。人而不仁。如樂何。

仁。人心也。禮。樂由人心生。禮惟中正。樂惟和平。人心中正和平。卽無文之禮。無聲之樂。然後與玉帛鐘鼓交暢。不仁之人。邪僻乖戾。雖玉帛鐘鼓。人自人。禮樂

自禮樂如猿狙著衣冠直無可奈何耳

聖人言樂必先言禮卽詩三百一言以蔽之意樂不外禮禮立而樂成之爲仁先復禮能敬則自和三桓輩歌雍舞八佾始于不知禮不知禮由于心不仁故曰是可忍孰不可忍如禮樂何者顛倒暴戾不可言之狀禮器云忠信之人可以學禮忠信便是仁季氏逮闇而祭有司跛倚亦是無如禮何

林放問禮之本子曰大哉問禮與其奢也寧儉喪與其易異也寧戚

魯人有林放者傷禮文曰勝奢則不遜而問禮之本

問本則以所見皆末也。隱然有反本從先博節  
之思。當世士大夫無此識。故夫子大其問。以其關係  
人心世教也。禮與其奢寧儉。言無文乃禮之本也。喪  
與其變寧戚。言不易乃禮之本也。寧安也。心願之辭。  
易變也。變易而生節文也。禮獨舉喪者。良心最切近  
本也。喪禮初惟有哀。變而成文。如日月有久近。服式  
有降殺之類。禮惟喪多變。檀弓云。喪禮哀之至也。節  
哀順變也。變卽易也。喪服傳云。喪成人者其文縗。縗  
卽易也。禮始無文。變而成奢。喪始哀戚。變而成縗。寧  
戚卽寧儉意。舍末趨本也。禮器云。禮之近人情者。非



其至者也。郊血大饗腥。又云禮者反本脩古。不忘其初。大路越席。大羹玄酒。皆貴初也。卽寧儉寧戚之意。孟子告墨者夷之。引上世不葬其親親死委壑。他日過之。其顙有泚。中心達于面目。乃掩其親。正是戚爲喪禮之本。後世所以變易而生喪禮者也。

禮惟喪多文。爲其情本勝也。聖人以送死爲大事。慮恒情穢虐士而賤所親。故于喪獨鄭重焉。五服之等。詳陽貨篇。宰我章。其他節文變易如始死有復。有赴。告有遷尸。有沐浴。有飯含。有襲。有禭。有小斂。有大斂。有殯。有筮宅。有卜日。有啓殯。有遷柩。有明器。有贈。有

贈有行有送有窆有反哭始死有斂奠有殯奠有朝夕奠有殷奠有啓奠有祖奠有遣奠既葬有虞祭有卒哭有耐祭有練祭有祥祭有禫祭始死主人有笄纓有脫髦有括髮有袒免有袒免括髮有袒免不括髮有免以布有免不以布有卽位有哭踊有襲經有成服有不絕聲哭有朝夕哭有無時哭喪期有三年有期年有九月有五月有三月始死三日殯三月葬十三月小祥二十五月大祥二十七月喪除始死孝子三日不食旣殯食粥三月沐期年疏食菜果大祥有醯醬禫乃飲醴酒食乾肉始死居倚廬寢苫枕塊

不脫絰帶。卒哭。柱楣。翦屏。小祥。居堊室。寢席。大祥。復寢。禭乃牀。斬衰之喪。三日不食。齊衰二日不食。大功三不食。小功再不食。緦麻一不食。士與斂者一不食。斬衰布三升。齊衰布四五六升。大功布七八九升。小功布十一十二升。緦麻布流治其縷。七升有半。冠布細于衰布。既喪以冠布爲衰布。斬衰初喪布三升。冠六升。既葬衰六升。冠七升。齊衰初喪四升。冠七升。既葬衰七升。冠八升。既期以葬後冠布爲衰而以練熟細布爲冠。故曰練也。冠有緦。武有布。武有屬。有不屬。有外。緦冠纓有繩。有布。經有首。經有腰。經有纓。經

有環經有直麻經有牡麻經首經去五分之一以爲  
腰經斬衰經大搨去五分一以爲帶齊衰之經斬衰  
之帶也大功之經齊衰之帶也小功之經大功之帶  
也總麻之經小功之帶也帶視經各小五分之一有  
麻經有葛經始成服麻經既葬男以葛易腰經女以  
葛易首經除喪男子先除首婦人先除腰男重首女  
重腰除先重易先輕也帶有麻絞帶有布大帶斬惟  
絞帶齊以下各加布帶絞帶有絞垂者有散垂者麻  
有絕本者有不絕本者杖有直杖有削杖斬衰直杖  
竹也齊衰削杖桐也有以爵杖者有以主杖者有以

病杖者婦人童子非爲主不杖有杖卽位者有杖不以卽位者有杖不入室者有杖不升堂者屨有苴屨斬也有薦蒯屨齊也有繩屨期以下也此類尚多不可枚舉皆所謂喪禮之易者也

子曰夷狄之有君不如諸夏之亡無也

中國所以不爲夷狄者以夷狄無君也今夷狄亦有有君者矣諸夏有君今亦有無君者矣夷狄之無君者不足言而有君者終未化犬羊之習其中國之無君者猶襲衣冠禮樂之文夷狄有君者不及也蓋夷狄之君不過威力驅脅利則附害則相攻非有仁義

忠信之實。諸夏之無君。惟是姦雄。僭竊壞法亂紀。而忠臣義士之心。天冠地履之分。未嘗一日不昭明。不以世亂而改夷狄豺狼。所以不如賴有此耳。此章之言。爲當世賊臣。如三家輩。攘奪狂悖。無異夷狄。不欲直斥。而微婉諷刺如此。古註近之。朱註與聖意相違。必如所云。兩之字當塗抹。不如字當作不同解。篇中無友不如己焉。不如丘之好學。不如學也。弗如也。吾與女弗如也。之類。皆作不及解。不應此獨異。司馬遷作七國年表論云。秦之德義不如魯衛之暴戾。正用此語。

東裔曰夷西裔曰狄有君如名王酋長之類等級儘分明下皆能奉上上皆能馭其下諸衆也夏六也華彩也雉羽曰夏中國禮樂文明故稱華夏王制四海九州凡千七百七十三國所謂衆夏也三代以上封建皆神明之後其見于春秋者猶百二十有四國凡書國號者皆諸夏也夷狄介于其間則書戎書狄蓋歷代化外遺種如河南有新城之蠻河西有白狄赤狄洛陽王城亦有泉臯陸渾之戎皆殘孽餘燼無幾自漢儒解春秋以楚吳越皆爲蠻荒淮以南爲羣蠻襄鄧江漢爲荆蠻秦關爲西戎燕薊之間爲山戎杞

遷淳于邾近東魯徐淮介莒萊牟等國一切斥爲夷其稱諸夏者僅齊晉魯衛宋鄭陳許數國耳撮其地不敵今十數郡于天下不及五分之一何以爲諸夏乎千載承訛習而不察解詳春秋

季氏旅於泰山子謂冉有曰女汝弗能救與對曰不能子曰嗚呼曾謂泰山不如林放乎

旅陳也陳設以祭又衆也徧祭衆神也或云祭山曰旅禹貢蔡蒙旅平是也泰山東嶽在齊地禮云名山大川不以封天子設守焉天子巡守至一方則望祀三方曰三望諸侯望不越境內天子東巡守朝會東



諸侯則祭告柴望于泰山之下非諸侯之專祀也魯  
自僖公用郊三望大夫效尤遂祀泰山猶歌雍舞八  
佾之類非止僭諸侯耳救謂匡救不能救則其祭必  
矣夫既有人非豈無鬼責林放尚知禮泰山豈享非  
禮乎

矣晚年家臣作亂庶子奪適數世之後  
三子散沒不復振積不善之家必有餘殃諒夫

禮天子祭天地巡守所至望祭四方嶽瀆名山大川  
諸侯祭境內山川大夫祭五祀苟非其所主而祭則  
精誠不通其鬼不享祭統曰賢者之祭必受其福非

世所謂福也。福者備也。備者百順之名。無所不  
謂備。唯賢者能備。然後能祭泰山。一稱岱宗。岱代也。  
宗尊也。相傳謂王者受命易姓。告代于岱宗。東方生  
物之始。交代之鄉。爲羣嶽之長。公羊傳云。山川能潤  
百里者。天子秩而祭之。觸石而出。膚寸而合。不崇朝  
而遍雨天下者。唯泰山。故世有七十二君封禪泰山  
之說。漢袁宏云。天地者萬物之官府。山川者雲雨之  
丘墟。化洽天下。則功配天地。澤流一國。則德合山川。  
舜東巡守。至于岱宗。萬物所始也。苟德不周洽。不得  
輒議斯禮。由此言之。雖天子無功德。尚不敢祀泰山。

況諸侯乎。況大夫乎。禮諸侯雖祭山川不越封內。春秋傳云。三代命祀。望不越境。泰山在齊。非魯封也。齊宣王欲毀明堂。卽天子東巡。守朝泰山下之明堂。齊世家云。適齊自泰山屬之琅邪。北被于海。禮器云。齊人將有事于泰山。先有事于配林。則泰山在齊境甚明。而魯頌云。泰山巖巖。魯邦所瞻瞻。卽望也。非謂泰山在魯也。魯頌誇誕。始于成王崇祀周公。而東遷以後。王室卑。魯僖公用郊三望。至定哀間。公室卑。三家強。而大夫皆王禮矣。易云。履霜。堅冰至。豈朝夕之故。夫子爲魯司寇。攝相。未能驟正。退而取魯史脩春秋。

刪詩存魯頌亦不能救而寓諸言也其又奚責于冉  
求然猶必問之冉求者何也季氏信仲尼不如信冉  
求求不能救聖人末如之何矣所以付之長大息耳  
○冉有孔子弟子字子有魯人少孔子二十九歲爲  
季氏宰弟子行云恭老卹幼不忘賓旅好學博藝省  
物而勤是冉求之行也○季桓子將死屬其嗣康子  
曰必召仲尼公之魚曰昔吾先君用之不終爲諸侯  
笑今又用之不能終是再爲諸侯笑康子曰誰召而  
可召冉求

泰山之高參天入雲周迴三千里道家謂天孫之宮

言言集 卷三  
人靈之府五嶽之宗也。一統志云泰山在泰安州有三峯。東曰日觀雞鳴可見日。西曰秦觀可望長安。又西越觀可望會稽。一名吳觀。東西二天門屈曲而上五十餘盤。仰視天門如窟。黃河去山二百餘里。若在山趾。

子曰。君子無所爭。必也射乎。揖讓而升。下而飲。其爭也君子。

射者。殺人之事。先王制爲禮以節之。猶干戚之試于樂也。射有勝負。則有爭。惟君子行射。雍容揖讓。以禮始。以禮終。是爲君子之爭。君子無爭不止。射而惟射。

人已勝負相形然且如此他可知矣升升堂升  
皆立堂上侯在堂下各耦相揖讓升堂發矢畢又揖  
讓下堂復位待衆耦皆射畢各勝者以序揖不勝者  
同升堂飲罰爵也

君子無所爭言天下無一事一物爲君子所爭者彼  
自視其身于天地間猶滄海一粟戴晉人所謂蝸角  
蠻觸耳視世上順逆好醜倏來倏去如石火電光何  
者爲我可常保而欲必得之必爭之乎子云人失人  
得去其楚而可者也凡事撙節退讓以明禮雖處勝  
負無奔競上人之心記云禮至則不爭射而無爭益

見君子。非謂凡射者皆能不爭也。亦非謂凡無爭者必于射也。蓋先王制爲射禮。因爭以導讓。借禮以化爭。故于射觀德焉。有德乃能射。射義云。古天子以射選諸侯。卿大夫士。事之盡禮樂而可數爲以立德行者。莫如射。故孔子射。未嘗相之。圃使子路延射。曰。亡國之大夫與爲人後者。不入此。皆好爭者也。又云。幼壯孝弟。耆耄好禮。不從流俗。脩身以俟死者。否。在此位。又曰。好學不倦。好禮不變。旄期稱道不亂者。否。在此位。此真無爭者也。世人工射者多。閑禮者少。有君子之德。則自雍容揖讓。周旋中禮。無侮無傲。蓋君子

雖關弓挾矢不忘禮讓小人雖從容譚笑常懷戈矛  
小人之讓不如君子之爭不然小人非不射何獨不  
君子乎

天子諸侯之射謂大射民間之射謂鄉射賓主飲酒  
射謂燕射每射二人爲耦天子六耦諸侯四耦大夫  
三耦此爲正耦正耦之外有衆耦衆耦無算凡耦皆  
立堂西東面將射同耦卽次東面一揖出轉身向西  
階北面一揖行及階下一揖升盡階將登堂一揖東  
行當物北向一揖畫地爲射位曰物前進及物一揖  
各立物中南向發矢升凡六揖堂下三揖堂上三揖



也發矢畢下堂復位亦堂上三揖堂下三揖也衆耦皆如前升射畢算中乃設豐于堂上西楹之西勝者子弟洗解酌酒奠豐上勝者揖不勝者同升三揖及階勝者先升堂少右不勝者至豐北面坐取解立飲先降凡飲酒主賓獻酬必拜送爵唯射不勝者自取飲無拜送示罰也

子夏問曰巧笑倩

千去聲

今美目盼

攀去聲

今素以爲絢

今何謂也子曰繪事後素曰禮後乎子曰起予者商也始可與言詩已矣

倩笑貌盼目動貌絢文彩也此衛風碩人之二章今

詩逸末一句。或云夫子刪之言人有此生質之美。不須更加文飾。卽素爲彩。猶詩云鬢髮如雲。不屑髥也。唐人詩云。却嫌脂粉污顏色。淡掃蛾眉朝至尊之意。是詩本詠衛莊姜之美。刺莊公好色不好德也。子夏非不知。而問其何謂者。凡詩多託興。故曰可以興。可以觀。古人言詩多斷章取義。理在事外。志在辭外。如以本事則三百十一篇止。三百十一事。猶易六十四卦止。六十四占。而稽虛待實。於理無所不貫。故說詩非據本事耳。子夏之問。便是深于詩者。三語蒙本事解。則俚而淺。子夏覺有深味。窮其歸趣。問當作何理。

會故夫子發揮文質先後之義彩畫曰給無文曰素  
事言凡事也後猶末也不急之意言凡文飾之事末  
也質素本也恒情喜文厭質君子先本後末先造化  
後入事貴自然而賤雕琢非獨容貌畫繪耳卽從先  
進與寧儉之意子夏因思藻繪文章禮之事也繪事  
後則禮不其後乎後有二意記云忠信之人可與學  
禮言不先也老氏云禮者忠信之薄言不貴也聖教  
雖言禮學者所以立而商賜言語文學誰非繪事今  
謂後于素意其有黯然之章顯之微費之隱者立于  
先乎禮殆非其至者矣此夫子所未嘗言二三子所

未嘗聞于今斯覺家語謂子夏好論精微蓋此類也  
要之道無先後一于黯者爲素隱一于章者爲狗象  
象與無象本同一貫故文與禮博與約非一非二顏  
子復禮不違如愚夫子學俎豆自謂不多默識者不  
著言語一貫者不涉漸次商之論詩及此可謂超然  
脫穎大變其文學之習而出于夫子期望之外故曰  
起予然擬議與默識尚隔下學而上達中庸之本訓  
也舍禮別求先亦不可爲訓故雖喜其起予亦祇與  
其言詩已矣者止于此之辭或問商與賜言詩孰優  
曰子貢明通子夏篤實切磋之喻顯禮後之悟深子

夏直挾象先子貢往來酬答間耳故商曰起予大越  
意表賜曰知來賜自知耳子旣已知之矣

古人畫繪雜施五彩界以粉素畧似物象耳如考工  
記云山以章水以麗畫火如半環畫雲如回紋之類  
後世畫工務求逼真謂之寫生至于唐宋伎倆始極  
近代學士亦頗作畫惟水墨點染不用丹青畧取氣  
韻適興而已古不如今繪事亦其一也繪事可舍絢  
還素禮不可去俗還雅乎

子曰夏禮吾能言之杞不足徵也殷禮吾能言之宋不  
足徵也文獻不足故也是則吾能徵之矣

昔周家祖孫父子兄弟皆以聖賢爲君相家法相承  
自足垂後故詩書惟陳祖德先代之禮湮沒不傳周  
禮不可詳考矣世所傳六官非盡周公之典大抵煩  
苛至于春秋時文武憲章太壞夫子欲損益而不得  
位仰思二代有從先進之思故曰吾能言之是豈徒  
欲言之而已道與時違空言無補故惜其無徵世苟  
宗予何以徵爲杞夏後宋殷後文典籍獻賢人二者  
不足國雖在猶亡矣先聖典刑湮滅無傳有斯文之  
責者焉得不感慨乎

禮運曰夫子之杞得夏時之宋得坤乾坤乾不可考

而夏時不卽今戴記所載夏小正何足以徵禮聖人  
生知雖殘篇斷簡神明旁燭況當時如邾子老聃  
弘輩猶有存者如在齊聞韶豈韶盡存三月忘味神  
明之至也向使得位陶鑄古今以爲畫一之典告顏  
子爲邦參酌四代詩錄商頌書存虞夏已露一班豈  
徒從周而已

杞夏後伯爵湯放桀封少康之後于杞是爲東樓公  
武王克商求禹後得東樓公後封于杞卽今開封府  
杞縣後遷統遷淳于淳于古州國近東海○宋殷  
亥子姓公晉武王封微子于商丘之墟奉湯祀卽今

子曰禘自既灌而往者吾不欲觀之矣

祭帝曰禘禮曰不王不禘三王之始祖皆古帝之苗裔祭其始祖所自出之帝曰禘每歲一舉舉以春故春祭曰禘世襲用其名而諸侯祭始祖皆謂之禘矣惟王者謂之大禘又謂大禘禮行于始祖廟上自始祖所出之帝下及羣廟祧主皆與焉故謂之祫祫合也周始祖后稷稷出自帝嚳祭法曰周人禘嚳而郊稷魯以諸侯祖周公周公出自文王魯遂禘文王于周公廟則是諸侯祖天子非禮也始于成王以天子



禮尊周公平王初年魯惠公乃請郊禘僖文以後遂  
盡用王禮襄昭以後三桓强大夫皆王禮矣定哀間  
三桓微楊虎從祀陪臣皆王禮矣此禘行于公家之  
大廟夫子與執事出而語人之辭灌始祭初亞獻求  
神之禮也主祭者以圭瓚酌鬱鬯之酒授尸尸受灌  
于地主婦再酌璋瓚授尸尸受再灌是謂二始旣灌  
乃迎牲薦侑朝踐饋獻饋熟堂事室事皆在灌以後  
唯宗廟有灌外神無之唯天子諸侯有灌大夫以下  
無之諸侯資鬯于天子有功天子乃賜以圭瓚鬱鬯  
明堂位云魯祭灌用玉瓚大圭薦獻樂舞皆天子禮

故夫子自灌以後卽不欲觀始不欲觀則終皆無足觀矣灌以前品式未見灌以往肆將獻酢皆天子禮樂以諸侯主祭顛倒錯亂人而不仁如禮何與于執事實非聖心所欲也

禘卽祫也鄭玄謂祫與禘異三年一禘五年一祫禘祀始祖所自出于始祖廟以始祖配之而羣廟主不與祫合祭羣廟主于始祖廟而始祖所自出之祖不與愚按詩商頌濬哲之詩大禘也而下及伊尹亦與焉周頌雝之詩大禘也而烈考文母亦與焉則是禘本合食合食卽祫以人情推之未有害其始祖之自

出而子孫有一不在者故禘必合食亦未有子孫于  
祖考三年然後一追祀五年然後一會食者無乃已  
疎乎故每歲以春禘爲常范氏子謂冬至可祀天夏  
至亦可祀祖改禘用七月是郊禘皆歲一舉甚明也  
學記云未卜禘不視學入學必以歲首若三年一卜  
禘視學學不已荒乎三年五年之說原出緯書或謂  
三年喪畢祫明年春禘于羣廟以後五年一禘三年  
一祫禘以夏祫以秋馬融王肅謂祫小禘大鄭玄謂  
祫大禘小賈逵劉歆謂一祭二名賈逵劉說是也大傳  
云不王不禘未云不王不祫春秋屢書禘亦不書祫

禘卽祫也。遠祖與羣廟祖俱在。故又謂之大事。若別有祫爲大事者。魯盡用王禮。豈獨遺祫乎。

天子諸侯宗廟之祭。皆有二灌。朝踐饋獻皆行于堂。及延尸入戶。薦熟醕尸。尸酢主人等禮。皆行于室。今載在儀禮。如特牲少牢。大夫士之禮。但有尸入室薦熟以下三獻之事。而天子諸侯全禮。亦可推矣。鄭玄輩揣摩其說。煩雜而大畧可舉。禮運云。腥其俎。熟其殺。腥其俎。卽朝踐之事。熟其殺。卽薦熟之事。又郊特牲云。大享腥三獻。燔一獻熟。蓋大禮貴質。腥生貴于燔。燔半生貴于熟。大祭則始薦腥。次燔。次熟。腥不可

食爛亦未可食熟乃可食也此禮行于朝旦曰朝踐大約王祭九獻始而大作樂迎尸入室王初灌用圭瓚爲一獻后亞灌用璋瓚爲二獻王出迎牲入庭尸出堂南面坐陳俎豆乃殺牲薦毛血腥肉于神王酌三獻后酌四獻所謂腥其俎也乃解牲體爛而進之王酌五獻后酌六獻謂之獻爛皆朝踐事也堂事終乃焚蕭脂升臭求神謂之陰厭遂延尸入室東向坐取俎肉熟而薦之飯尸尸始食謂之饋熟食畢王酌醑尸醑胤也繼食而飲曰醑是爲七獻后再醑爲八獻諸臣又醑爲九獻此謂正獻以後賓客兄弟嗣子

等獻謂加爵。今儀禮但有陰厭酹尸以下三獻。大夫士之禮無獻燭之事。鄭解以二灌朝踐饋獻爲前三節。酹尸爲後一節。愚謂灌腥燭堂事皆朝踐也。饋食酹食皆終祭之事也。

灌通作裸。酒用鬱鬯。周禮鬱人凡祭祀賓客之裸事。和鬱鬯。鬱香草也。鬯酒氣也。以秬黍釀酒。搗鬱汁和之。祭統云。祭有三重。獻之屬莫重于裸。凡祭先以酒灌地求神。地爲陰。酒陰物。求神于陰也。燔煙升臭求神于陽也。殷人先求諸陽。周人先求諸陰。故先裸。字從示。果聲。取地祇果出之義。詩云。裸將于京。書洛誥

云王入太室裸。周禮裸圭有瓊以祀先王。裸賓客。則是生人飲酒亦稱裸也。故投壺云。奉觴賜灌。又通作果。周禮大宗伯大賓客則攝而載裸。孟子云。舜被袵衣鼓琴。二女果是也。古字隨便通用。多此類。

或問禘之說。子曰。不知也。知其說者之於天下也。其如示諸斯乎。指其掌。

禘詳前。魯禘非禮。故或人問其說。說猶解釋也。魯以諸侯用王祭。更有何解釋。猶陳司敗問昭公知禮之意。夫子難于直託言不知。諱國惡也。又推原不知之故。以維禮也。知其說。卽知不王不禘之說。苟知不王。

不禘諸侯自不敢僭天子。大夫亦不敢僭諸侯。陪臣  
又何敢僭大夫。民志定。上下辨。天下順治矣。所謂道  
邇非遠。事易非難。記云。知其義而守之。天子所以治  
天下。卽此意。於天下云者。隱然見爲天子之事。非有  
國有家者所得預。夫子言此。一手伸掌。一手自指云。  
知視諸斯。記者恐後世不知斯爲何物。故記指其掌。  
蓋以大義昭然。有目共覩。何事于問。何事于說。何待  
于知者而後知。斯民也。三代所以直道而行。聖人無  
隱。春秋所以無毀譽。卽指掌之意。

此章末知。與後章入大廟每事問。血脉相應。每事問。



正爲不知耳。或人所以譏也。聖人無誑語。魯禘反常。何怪疑問。上下順逆之機。捷于反手。子云禮樂征伐。自諸侯出。十世希不失矣。自大夫出。五世希不失矣。陪臣執國命。三世希不失矣。天下有道。則政不在大夫。則庶人不議。孟子告梁惠王云。王曰。何以利吾國。大夫曰。何以利吾家。士庶人曰。何以利吾身。上下交征利而國危矣。故曰。上老老而民興孝。上長長而民興弟。治天下可運于掌。一人貪戾。一國作亂。其機如此。卽視諸掌之意。朱註仁義誠敬之說。愈難愈遠矣。記明堂位云。成王以周公有大功于王室。賜以

天子禮樂崇德報功則有之矣然止祀周公耳東遷以後諸侯僭亂魯遂盡用天子禮豈盡成王之賜與魯頌閔宮云周公之孫莊公之子龍旂承祀六轡耳耳皇皇后帝皇祖后稷夫莊公之子卽僖公也皇皇后帝郊天也皇祖后稷大禘也又云泰山巖巖魯邦所瞻柴望也春秋書郊書三望皆始僖公文宣以後季孫行父作頌起廟樂三家承風歌雍舞八佾凡此豈盡成王之賜與故子云魯之郊禘非禮也周公其衰矣儻成王之賜而夫子云然乎

祭如在祭神如神在子曰吾不與犛祭如不祭

祭祭祖考子孫之精神卽祖考也祭神祭百神人之精神卽百神也祭者人道也事死如事生事鬼如事人鬼神不可見而人事可見自盡其誠自運其精神故曰如在祭義曰祭之日入室僂然必有見乎其位周還出戶肅然必有聞乎其容聲出戶而聽愾然必有聞乎其歎息之聲致愛則存致慤則著著存不忘乎心卽如在之意曾是而可以人代乎不與祭蓋設辭如居喪之類祭或不與則如未祭蓋與祭則如在不與則不得見其如在苟不與祭而可爲祭則祭亦必如在矣

大虛之精爽聚而爲人散而爲鬼神人者鬼神之會  
鬼神之精爽卽人心人心卽有形之鬼神鬼神卽無  
形之人神不能違人也故古者祀神必用尸儻尸必  
用侑神依于人也子路問事鬼神子曰未能事人焉  
能事鬼惟聖人精誠與鬼神同運故曰我祭則受福  
是真有鬼神洋洋在上不但如之耳中庸云微之顯  
誠之不可揜如此夫後世祭法不傳祭義不明天地  
祖宗之祭以爲虛文矣春秋繁露云祭之言際也察  
也祭然後能見其所不見見其所不見然後知天命  
鬼神知天命鬼神然後明祭之義故記者記此于問

禘之後天子精神與始祖通祭如始祖在與天通祭如天在諸侯精神與山川社稷通祭如山川社稷在大夫士庶人亦然各因分大小對越人鬼相因神其來格若魯用禘用郊季氏旅泰山祭者與主者非親非故神如有知怪而去之焉得在惟聖人神明合德則祭如在他人攝則如未祭他人之精神終不可爲己之精神他人之感格終不可爲己之感格況以他人之祖考爲己之祖考以他人之鬼神爲己之鬼神其謬戾愈甚神之不格宜也謂之不祭亦宜也

孫賈問曰與其媚於奧寧媚於竈何謂也子曰不然

獲罪於天無所禱也

夫子居衛王孫賈用事設奧竈之喻諷夫子附己也  
室西南隅曰奧古者前堂後室負陰抱陽堂向明以  
中爲尊當兩楹間左右通達堂後爲室室主陰以右  
爲尊向東迎生氣也戶在東南隅戶內曰窻進東北  
隅曰窻移轉西北隅曰屋漏又轉西南隅曰奧奧最  
深處凡祭皆求神于其所而迎尸入于奧苟祭于其  
所則褻徒祭于奧則非神所栖故堂事薦腥畢陰厭  
乃迎尸入奧饋熟五祀皆然竈者五祀之一人所依  
以養道家謂廚爲司命故賈以竈自比以奧比君奧

虛位也。竈當事也。賈意在市。福夫子惕之以禍。意在  
自尊。夫子壓之以天。媚者。蠱惑之名。人邪媚不安。命  
卽是獲罪于天。天者。大虛。大虛者。理也。天敘天秩。一  
毫乖理。卽與天違。卽滅絕生理。凶咎卽至。何禱可免。  
孟子云。莫之爲而爲者。天莫之致而至者。命。莫爲莫  
致。謂之自然。自然曰道。道莫大乎自然。強弱大小治  
亂得失。莫不各有因應往來屈伸之理。皆天也。孟子  
以事大爲順天。夫子以媚竈爲逆天。順逆從違。惟聖  
賢盡性致命。精義入神。乃能會其通而因應。所以爲  
無可無不可也。

天以一大爲義一者虛也大者天之形氣也張子厚云由大虛有天之名虛生靈老子謂之谷神此百神之祖也大虛內物之至大者無如天昭昭垂象卽大虛神靈之可見者天所以大不以形以德無私故大人心無私與天同大中庸云大德敦化小德川流此天地所以爲大也故聖人法天

王孫賈衛大夫衛靈公親信之使典軍旅見十四篇○竈造也造爲飲食記云竈者老婦之祭盛于盆尊于瓶禮有五祀春祀戶夏祀竈夏季祀中霤秋祀門冬祀行白虎通云冬祀井五祀皆切民生先王分四



時祭以報之卽五氣之靈也左傳家語謂爲重黎句  
龍等五官蓋事之以人道也戶爲木古者戶在室東  
南以司出發生之象故祀于春竈火也祀于夏中霤  
宅中央爲土夏季土旺時祀之門司閉應收斂爲金  
祀于秋行卽井爲水古者井其地井間爲道道間爲  
溝道旁汲水謂行潦冬水歸宅祀于冬祭戶以羊羊  
羶木氣也祭竈以雉象文明也中霤以牛象土也門  
以犬犬司守象門也井以魚或云以豕詩云豕涉波  
象水也五祀皆有尸尸皆迎入奧祭法又云王立七  
祀加司命泰厲爲七諸侯五祀大夫三祀士二祀庶

人一祀鄭玄云此周制也史記云李少君以祀竈却老方見武帝帝親祀竈抱樸子云竈神以月晦日升天言人罪狀悠謬之譚其來已久○說文天顛也高無上故字從一大物理論云天者旋也均也積陽純剛其體迴旋羣生所大仰又曰水土之氣升而爲天又云天如雞子地如中黃天大而地小表裏有水四海之表浮于元氣之上天地者乘元氣載水而行也○列子云有形者生于無形則天地安從生有太易有太初有太始有太素太易者未見氣也太初者氣之始也太始者形之始也太素者質之始也未相離

曰渾淪易無形埒變而爲一一變而爲七七變而爲  
九九者變之究也乃復變而爲一一者形變之始也  
清輕者上爲天濁重者下爲地冲和者爲人故天地  
舍精萬物化生○祛疑說云自天統開于子輕清之  
炁一萬八百年升而爲天天之晶華凝結而爲日月  
星辰成象旣著功用乃行地統開于丑重濁之炁萬  
八百年凝而爲地地之靈氣融結而山川河嶽成形  
旣定盼響攸召○邵子云天依形地附氣天地自相  
倚附○草木子云天惟炁故無極地成形故有終天  
地之先惟水水滓成土水土震蕩水落而土出成山

川故山有波形水土合和而生金石木火變化無窮  
又云天如勁風旋轉局大塊于中日月星辰之上愈  
高愈清勁光明無際故天裂處火光見地坼處泉水  
溢天爲陽宗風火在上地爲陰統水土在下○緯書  
云周天三百六十五度四分度之一一度爲千九百  
三十二里又曰從上臨下八萬里又云天周圍百七  
萬一千里以圍三徑一計之直徑三十五萬七千里  
地在中上下正半○大抵天地在大虛內不過形氣  
之最大者與人物共資大虛立命恒人見小難與言  
大故卽昭昭者語之所謂不可使知之也地者大虛

內渣滓禪家謂四大之一耳大虛視天地如天地視  
人大虛視人物如人自視身上毛髮蟣虱天地人物  
在大虛中憑元氣浮泛如一雞子在大海水中故大  
虛無窮或問無窮何窮曰既無窮矣復何窮所以爲  
大虛

子曰周監於二代郁郁乎文哉吾從周

監視也有參酌意郁郁文盛貌記謂夏尚忠商尚質  
周尚文周兼二代之禮其說緣于此大抵天運人事  
不得不然聖人惟變而通之禹湯經畫于前文武  
周公繼承于後參伍潤色綱紀文物大備尚論者見

謂文勝而文武周公非故欲文也。夫子亦非擇于文從也。先聖後聖不能違時耳。比至春秋僭亂禮樂大壞祖宗憲章。臣子尚不能守。況遠追隆古乎。夫子所以有夏商之思。而又發從周之嘆也。然亦有微意。感二代之無傳。傷周公之已衰。雖有其德。苟無其位。不致作禮樂。是以書存虞夏。詩存商頌。告顏子焉。邦其意亦可知矣。

子入大廟。每事問。或曰。孰謂鄒人之子知禮乎。入大廟。每事問。子聞之曰。是禮也。

太廟。太祖廟。魯太祖周公也。羣公謂之小廟。周禮祭

僖復于小廟是也。魯祀周公舊矣。至僖公始用郊。成  
公作頌。起廟樂。定哀之間。三家皆用天子禮樂。則周  
公廟亦非伯禽之舊矣。故明堂位云。大廟。天子之明  
堂也。山節藻梲。復廟重檐。刮楹達鄉。向反。拈出尊崇。  
坳康圭疏屏。天子之廟飾也。夫子入廟。每事問者。問  
其度數品式陳設之事。聖人雖生知。非素歷未易通  
曉。而魯制違禮。亦欲考其名實。非已知而問。非無爲  
而問也。或人譏其不知。固妄然。夫子于禘。自謂不知。  
亦所不辭。但疑則思問。人臣奉法。禮當如是。況孝子  
祀先。無稽妄作。豈禮乎。言外有不盡之感。

聖人誨人卽是學。不知而每事問。卽所謂不知爲不知。是知也。凡聖人之知卽是行。或人惟論知不知。聖人惟論是不是。知與禮猶二。是與禮爲一。

廟之言貌也。祖考形貌所在也。王制云。天子七廟。三昭三穆。與太祖之廟而七。諸侯五廟。二昭二穆。與太祖之廟而五。大夫三廟。一昭一穆。與太祖之廟而三。士一廟。庶人祭于寢。七廟者。禮自身以上。父祖曾高。爲四親。及始造命者爲太祖。共五大祖而下。四親而上。五服之外。親盡之祖。爲祧廟者二。祧。迢遠也。二祧與五廟爲七。或云。天子有二宗。與太祖廟同百世不



遷爲七也。凡廟建于王宮左南向。各有門堂寢室週牆。太廟居北正中。左三爲昭。右三爲穆。以次堂而南。太廟奉大祖主。昭北一廟奉二世祖主。穆北一廟奉三世祖主。昭二廟奉四世祖主。穆二廟奉五世祖主。昭三廟奉六世祖主。穆三廟奉七世祖主。父昭則子穆。父子不共昭穆。世遠廟數不足。則以新主繼于昭穆之南。廟而以盡北。祧廟主遷于大廟之夾室藏焉。餘三廟主以次自南升而北。昭升于昭。穆升于穆。左右不相參也。凡廟向南。主向東。大祫則合羣廟及祧主祀于大祖廟。唯大祖主東向。自如。而羣主皆以南

北爲左右。左向南爲昭。右向北爲穆。此天子七廟之制也。諸侯四親。與始封之君爲五大夫始祖。卽諸侯次子之始爲大夫者。與祖父廟爲三。士止祀其父爲一廟。禮不下庶人。無廟。祭于寢。魯本諸侯。宜五廟。而明堂位云魯公之廟。文世室也。武公之廟。武世室也。惟天子有世室。魯有之。是七廟與天子同也。春秋定公元年立煬宮。是八廟也。三年五月桓廟。僖廟。災。桓至哀已十一世。僖至哀已八世。而廟皆在。是十廟也。魯制不經如此。

鄆。魯下邑。漢以後爲魯縣。今兗州府曲阜縣是鄆人。

孔子父叔梁紇也嘗爲鄆邑大夫其先出宋微子之裔有弗父何者世爲宋卿三傳爲正考父生孔甫嘉五世親盡別爲公族遂以孔爲氏三傳爲孔防叔避華氏之禍奔魯防生伯夏伯夏生叔梁紇紇嬖于顏氏女曰徵在禱于尼丘之山而生孔子因以名而字焉孔子生三歲叔梁紇卒人謂爲鄆人子子曰射不主皮爲力不同科古之道也

射本武備聖人文之以禮樂亦猶教童者之舞干戚也古聖人隨事節之以禮而于射尤委悉昔有窮后之弑君逢蒙之害師爲無禮也故聖人制爲射禮教

天下後世以觀德焉。詳見儀禮。周禮鄉大夫職以鄉射五物詢衆庶。一曰和二曰容三曰主皮四曰和頌五曰興舞。詳見周禮。主皮主中侯也。侯用布中受矢處用皮。卽正鵠也。矢穿正鵠乃算中。卽貫革也。革卽皮也。射皆主皮。此云不主者。謂五物兼詢。不但主中而已。儀禮鄉射記云。禮射主皮。主皮之射。勝者又射。不勝者降。此與鄉射主皮異。蓋天子將祭。選羣臣助祭。先狩于澤中。射主獲禽。不用侯。張獸皮。或革甲。楯質以射。力能穿皮者爲勝。否爲不勝。不勝者退。不復與射。更進一人與勝者較。惟主有力。不必和容和頌。

興舞也。周禮夏官司弓矢職云：王弓弧弓以授射甲革楯質者。又云：澤供射楯質之弓矢，卽此也。符畢取所獲禽，陳于澤宮。乃張侯。禮射頒禽，惟論和容和頒興舞。有德者雖不中，亦得禽。無德者雖中，不算不得禽。此所謂不主皮也。與他禮射異。他禮射未有不主中者。主中者，未有不貫侯者。不貫則矢不集。詩美魯莊公威儀之美，亦云：射則貫兮。鄉射禮將射，司馬命曰：不貫，不釋大射禮。將射，司射命執算者曰：中離維綱。揚觸捫復。公則釋獲。衆則不與言矢。揚起觸侯與叩侯復墜者，皆不算中。故射必貫侯而後算中也。朱註

未確此章蓋据澤射而言當時好戰尚力禮射但主皮而和容興舞盡廢故發此嘆非謂射原不主質革也科猶科舉之科程士曰科字从禾从斗程量之意主皮所以程力力有强弱不可勉而和容興舞以程德人皆可脩力不中程將併揜德所以禮射兼詢五物不專主皮崇文之道也古道廢不止此卽此而世變皆可知

天子諸侯射于國中及射于澤宮謂之大射士庶人射于鄉謂之鄉射賓主射謂之賓射燕飲射謂之燕射考工記梓人爲侯廣與崇方三分其廣而鵠居一

鵠鶴屬大鳥也鄭玄云小鳥難中不知古人正取大鳥易中耳侯形似猴立于彼以侯射也虞書曰侯以明之天子中之以服諸侯諸侯中之得爲諸侯故名侯大射之侯中以皮爲鵠賓燕射之侯中畫布爲正凡侯皆布其中三分之一用皮外三分之一又用皮緣之賓燕射之侯外緣用皮中畫布處無皮天子侯大而遠諸侯大夫以次降侯中心以遠近爲廣狹天子侯中廣一丈八尺侯道九十弓諸侯侯中廣一丈四尺侯道七十弓大夫侯中廣一丈侯道五十弓每侯道一弓以二寸爲侯中詳射禮

子貢欲去告谷朔之餼歲羊子曰賜也爾愛其羊我愛其禮

朔言蘇生也月首日爲朔謂月鬼晦極復生明也古天子用十二竹簡書十二月朔日之辰及月之節候與所行政事如月令之類頒于諸侯周禮六官正月之吉始和布治于邦國都鄙縣治象之法于象魏卽此時也周正月建子卽今十一月先歲冬至頒來歲十二月令于諸侯諸侯受而藏之大祖廟每月朔殺特羊告廟集羣臣臨視頒行又謂視朔又謂聽朔一以敬天一以尊王一以尊祖一以防廢閣美意良法



也禮記玉藻云天子聽朔于南門外諸侯聽朔于太廟周衰正朔雖存天子不頒朔諸侯以國紀年魯自文公不告朔迄定哀間有司猶月供一羊生三曰餼腥肉亦曰餼餼羊以待殺也子貢謂此羊虛設去之惜費耳愛惜也聖人念羊本爲禮設禮不行而羊在猶禮也二其字指告朔其羊其禮之羊也非指其羊之禮也以羊視羊虛費可惜以視視羊羊亦猶禮存羊亡禮遂亡矣可惜尤甚魯人廢禮有大不告朔者子貢欲去羊不爲無意夫子亦無以非之但聖人愛禮雖虛文猶愈於已禮終不復羊亦難保終

才去君子且未可作俑耳夫子此言非必謂羊存禮  
尚可復謂羊且可惜況于禮乎云爾

史黃帝得寶鼎神策推策迎日始有星官之書命大  
撓占斗綱所建始作甲子容成作蓋天象周天之形  
鬼臾區造曆積餘分以置閏配甲子而設節○玉海  
云自黃帝迄三代末凡二千四十四年曆七變漢四  
百年曆四變自魏晉迄隋又十六變而後魏後周六  
曆不與焉唐三百年曆九變自五代之調元欽天而  
曆法始弊宋自建隆迄慶元二百五十年間曆四變  
上距黃帝曆凡五十八變矣○星學天文論云昔堯

命羲和曆象日月星辰。舜制璿璣玉衡以齊七政。曰日中星鳥。以殷仲春。日永星火。以正仲夏。宵中星虛。以殷仲秋。日短星昴。以正仲冬。此因日度之至。以驗二十四氣之別也。又曰。以閏月定四時成歲。此因氣朔盈縮。以推章部紀元之數也。蓋天象經緯有常度。而往來不無參差。天包地外。地靜而天動。左旋東出。地上西入。地下一晝一夜。行三百六十五度四分度之一。地則土石之體。徑二十四度。水接于天。皆爲地。體徑九十七度四分度之三。土石與水共徑一百二十一度四分度之三。厚半之。勢傾于東南西北之高。

不過一度天之南北兩極爲上下之樞北高而南下  
台地上觀之北極出地上三十五度有餘南極入地  
下三十五度有餘兩極之中皆去九十一度三分度  
之一謂之赤道橫絡天腹以紀二十八宿相距之度  
故兩極居南北之中是謂天心居所不動中氣存焉  
由此斡旋自東而西分爲四時寒暑所以平陰陽所  
以和也經星二十八舍繫天不動紫微太微天市謂  
之三垣以象三台東方角亢氐房心尾箕爲蒼龍之  
形北方斗牛女虛危室壁爲玄龜之形西方奎婁胃  
昂畢觜參爲白虎之形南方井鬼柳星張翼轸爲朱

雀之形是謂二十八舍象諸侯四岳日象君月輔之  
五星五氣之精象六官木曰歲星火曰熒惑土曰鎮  
星金曰太白水曰辰星皆緯星并日月爲七政日體  
約徑一度所行之路謂黃道冬至日黃道出赤道外  
二十四度去北極遠故時寒而夜長夏至日黃道入  
赤道內二十四度去北極近故時暑而晝長春秋二  
分黃道與赤道相交當兩極中故時和而晝夜均月  
體亦徑一度少縮所行之路謂之白道其出入黃道  
不過六度日之運行每日約退天一度凡一歲退三  
百六十五度四分度之一退盡一周天與天會于原

處謂之歲月。每日退天約十三度有奇。凡二十七日有奇。退盡一周天。故二十九日有餘。與日會。謂之月。月與日同度。謂之朔。衝分天中。謂之望。光盡體伏。謂之晦。近一遠三。謂之弦。月行白道。與黃道正交之處。在朔則日食。在望正對虛暗之處。則月食。以日月之交會爲朔望之期。以日之行度爲寒暑之候。以四時言。則分爲四氣。以十二月言。則分爲六氣。每月分其中節。則二十四氣。每氣分爲三候。則七十二候。由是可以用天時。可以興地利。可以察妖祥。日爲陽精。主生養恩德。大君之象也。月爲陰精。主刑罰威權。大臣

之象也。五星輔佐日月，幹旋五氣，如六官分職，號令天下。天漢四瀆之精也。起鶉火，經西方之宿而過北方，至箕尾而入地下。十二辰十二月，斗綱所指之地也。天氣無形，可見觀斗綱所指之辰，可知斗有七星。第一曰魁，第五曰衡，第七曰杓。三者謂之斗綱。如建寅正月昏，則杓指寅。夜半衡指寅。平旦魁指寅。二月指卯。三月指辰。以至十二月指丑，皆可例推。日月所會之處，每歲十二辰。子曰：玄枵分野屬齊，丑曰星紀，分野屬吳。寅曰析木，屬燕。卯曰大火，屬宋。辰曰壽星，屬鄭。巳曰鶉尾，屬楚。午曰鶉火，屬周。未曰鶉首，屬秦。

申曰實沈屬晉酉曰大梁屬梁戌曰降婁屬魯亥曰  
陬訾屬衛此精氣所應非拘方位也天爲十二辰地  
爲十二州七政變異各以所屬分野占之而吉凶可  
知古言天者三家曰渾天曰宣夜曰蓋天宣夜無傳  
蓋天最舛渾天之儀有三曰六合儀曰三辰儀曰四  
游儀共爲一器卽璿璣玉衡之遺制也考其制北極  
偏于謫高之北南極偏于地中之南天之腰圍名曰  
赤道其東西在卯酉之位而斜倚于南天之位次有  
定氣而無定形者名曰地盤先天之體也動而無常  
經宿環旋者名天盤後天之用也用不外乎體卽其



體之運旋而謂之用天未始有二也故觀天授時之法如堯典所謂日短星昴以正仲冬之類謂仲冬晝短夜長日在地盤子位至昏子位入于酉位則酉之昴星在午位因是以驗時之仲冬其餘星火星鳥星虛之說皆可類推矣古今言曆法者程子推邵康節之歲差冠絕古今所謂歲差者蓋日躔歲有差而昏旦之星亦有差唐虞仲冬日在虛漢太初曆冬至日在牽牛之初許衡所定授時曆至元冬至日在箕初唐虞之日冬至在子而夏在午春分在酉而秋在卯今未四千年而冬至在寅夏至在申春秋二分在巳

亥其歲差已退五十餘度則後萬餘年冬至之日不  
及曉于牛乎此歲差不可不考而定歲置閏皆因是  
生孟子所謂求其故千歲之口至可坐而定者也蓋  
逆推上古冬至歲月日時皆甲子兩曜合璧五星連  
珠聚于亥枹之中名曰上元以求端于始從上元而  
下至今測驗相應乃可取證于後然七政左旋其精  
有陰陽之別其運不無遲速之異日行稍遲于天月  
退又甚于日氣朔所以不齊也二十四氣之儼每中  
節二氣凡三十日五時六刻有餘而日月合朔止于  
二十九日六時三刻有餘故氣盈于三百六十朔虛

于三百五十四合氣朔盈虛生閏故三年一閏十九  
年七閏無餘分而爲一章四章爲一部二十部爲一  
紀三紀爲一元復始是謂曆元先儒謂天左旋七政  
右旋今驗凡星昏在東者曉皆西墜昏所不見者曉  
皆東升是左旋甚明而天行甚速七政行不及天反  
退而成右耳○草木子云天爲動物久而必差古雖  
立差法而五十年差一度又大過百年差一度又不  
及七十五年差一度近之元人以八十一年差一度  
算已往減一年算將來加一年始爲精密又云歲日  
與天會也月日與月會也日日與度會也時日與辰

會也日行地盤一位爲一時故時有十二日有三十  
月有十二歲有三百六十至刻乃曆家自細分每時  
八刻六分刻之二共成一百刻刻有初正子午中分  
子初四刻屬本日正四刻作明日銅漏刻于甃上故  
名刻○漢大初曆凡十九年七閏爲一章章者至朔  
分齊閏無餘分也二十七章五百一十三歲爲一會  
日月交會一終也三會八十一章一千五百三十九  
歲爲一統閏朔并無餘分但非甲子歲首也凡三統  
二百四十三章四千六百一十七歲爲一元至是閏  
朔並無餘分又值甲子歲首也此楊子雲擬之以作

大玄也唐大衍曆亦以初年甲子日子時朔旦冬至在歲次甲子之首謂之至朔同日第二十年爲第二章首復得至朔同日然非甲子之先期夜半乃是癸卯日卯時第三十九年至朔同于癸未日午時第五十八年爲第四章首至朔復同于癸亥日卯時第七十七年至朔復同于癸卯日子時因至朔同在夜半與第一章同遂以七十六年爲一部四章爲部二十部爲紀計一千五百二十年至朔同甲子日之先期夜半但非甲子歲首耳三紀積四千五百六十年至朔同于甲子之先期夜半又甲子歲首會如初名一

元此僧一行推之以演大易也。曆說雖多不出二家之術。○自堯甲辰至大明洪武元年戊申共三千七百二十六年計六十三甲子。

說文羊祥也从𦍋。象頭角足尾之形。孔子云牛羊之字以形舉也。羊在六畜主給膳以大爲美。故美字从羊大。以瘦爲病。故羸字从羊。性善羣。故羣字亦从羊。獨字則从大。羊鳴曰咩。羊臭曰羴。羊初生曰達。小曰羔。未成曰羖。大曰羊。六尺曰羝。有褐曰黑。三色亦有青者。爾雅羊牡羖牝羖。夏羊牡羖牝羖。註云夏羊黑羊也。周禮羊人掌羊牲。宗廟用羊曰柔毛。春秋繁

言言  
露云凡贄卿用羔羔有角而不用如好仁者執之不  
鳴殺之不謗類死義者羔飲其母必跪類知禮者羊  
之爲言祥也故以爲贄

子曰事君盡禮人以爲諂也

朱註云孔子于事君之禮非有所加也如是而後盡  
耳時人不知反以爲諂何註云時事君者多無禮故  
以有禮者爲諂盡禮如拜下之類凡禮施于所當施  
爲敬加于所不當加爲諂云事君盡禮不云我事君  
云人以爲諂不云人不盡禮語意渾然無人我相形  
之迹非爲自白爲世道人心慨也禮有定體過則諂

不及則充適當其分則盡臣事君禮豈得不盡盡者  
以爲諂則不盡者以爲不諂上陵下替自此始雖違  
衆吾從下正此意

定公問君使臣臣事君如之何孔子對曰君使臣以禮  
臣事君以忠

魯季氏逐昭公魯死千外廢其二子援立定公當時  
君臣事使之間可知也定公本昏懦之主故教之禮  
以防下三家爲欺罔之臣故教之忠以事君語意責  
成在君邊臣雖不忠君惟有禮惟禮不可欺禮器云  
無節于內者觀物弗之察矣欲察物而不由禮弗之



得矣故惟禮可以作忠齊景公憂田氏之逼晏子曰  
唯禮可以已之善哉知本之言興衰撥亂銷患遠辱  
之道不過此夫子告哀公爲政亦曰爲政先禮物恥  
足以興之告子路治蒲曰恭而敬可以懾勇寬而正  
可以懷強溫而斷可以抑奸亦此意安富尊榮計無  
踰于禮者三千七十之徒周旋夫子亦惟禮以服之  
故夫子在春秋以知禮聞則所謂使臣以禮者豈徒  
不犬馬畜臣之謂乎若徒以接遇隆厚爲禮而不知  
恭儉莊敬爲禮亦烏足以使其臣哉

定公名宋襄公子昭公之弟在位十五年詳第二篇

子曰關雎樂而不淫哀而不傷

二南之詩周家王業太平之後周公作禮樂追詠周道始興文王后妃脩身齊家治國之事以爲后世法程也古序自明其序關雎不言文王大妃泛言后妃之德者蓋所詠求淑女以相君子變藻以爲衣服和羹以備祭祀衽席寤寐有求賢之恩左右嬪御無嫉妬之意凡爲后妃者皆當如此也故曰后妃之德夫子刪詩以冠三百教化之興閨門爲始哀樂之情男女爲至關雎哀樂爲求賢以相君子誠敬以奉祭祀其樂非謔浪宴笑之喜其哀非伉儷怨懟之悲其辭

馴雅其聲平淡視秦有桑中之放蕩風雨雞鳴之悽惋理欲不同情所以中正和平得性情之正爲聖德之形容脩齊之本壹教之宗也

朱子改古序謂關雎爲王季宮人喜文王得太姒而作非也詳見詩解詩名關雎取章首關關雎鳩命篇關關雎鳩鳴聲雎鳩鳥名卽布穀也當春鳴則播種其聲如云開倉撒穀遠聽關關然月令二月鷹化爲鳩五月鳩復化爲鷹其目雎然怒視如鷹晉孔羣云陽布氣鷹化爲鳩至于識者猶憎其眼字从目聲聲或改从且鑿也他鳩不能高飛飛卽不能鳴惟雎

鳩鳴且高飛。故又名鳴鳩。月令鳴鳩拂其羽。小宛詩云宛彼鳴鳩。翰飛戾天。刺幽王無夫婦。忝關雎也。鳥惟鳩多族。雎鳩乘陽變化。故以比王后。鳩鳩鵲多子。居鵲巢。無爲受成。故以比君夫人。凡詩鳥獸草木皆取目前至近。使人易曉。而楊雄郭璞陸機許慎之徒。無端遠引。浪猜于耳目見聞之外。好奇蔽之也。

哀公問社於宰我。宰我對曰。夏后氏以松。殷人以柏。周人以栗。曰。使民戰栗。子聞之曰。成事不說。遂事不諫。旣往不咎。

哀公初年。亳社災。公問社。問立社之主也。社土神。神

有主爲依在野則植樹如松柏之類表生物也在國則刊木爲主故宰我舉三代社主之木以對其說甚瑣又以殺人之事附會周粟因古者出師社主從行戮人則告于社也戰懼貌栗驚貌今人謂栗實迸落曰栗駭哀公孤弱每不平于三桓故宰我借社栗諷以威嚴不思人臣謀國當量機識時強臣割據而輕舉則興戎于國輕言則遺害于身夫子聞之難于斥而但數其可對者非一端見在曰成將然曰遂古昔曰往陳述曰說諍言曰諫懲創曰咎自文武分茅祚土宗祏民社昭代有成法其事可陳說也而不競

國家有事勢勢成在遂得勢則宗社遂安失勢則宗社遂危詩云莫遂莫達儒者謂春秋譏遂事權不可委機不可失此當諫也而不諫往古有明效大驗如夏社歸殷殷社歸周興廢何常得道者昌失道者亡此既往之可追咎者也而不咎區區爲此無稽之言不幾于誤君乎蓋三家之橫公室之卑已非一日而哀公孤立魯事未可有爲也故篇內凡夫子告定哀語皆極微婉周慎可爲人臣建白之法而末年公欲以諸侯除三桓不得正終固人謀不臧抑亦事遂難挽或牢我之言啓之與寧我慷慨志士忠憤有餘明

替不足卒致命于田常之難也悲夫

社后土之神古句龍氏生爲后土有功死而祀以爲社主祭法曰共工氏之霸九州也其子曰后土能平九州故祀以爲社五方各有分土食土之毛皆思美報天子土盡四海故祀天地而臣民受分土各有后土之祀故祭法王爲羣姓立社曰大社王自立社曰王社諸侯爲百姓立社曰國社自立社曰侯社大夫以下成羣立社曰置社古者民二十五家爲里里有社天子之社五色土爲壇封諸侯隨方色取大社土宜以茅授之諸侯受而歸以立國社焉周禮大宗伯

職王有大封先告于后土是也凡社有壇位無宮室  
受天陽也社主北向君負北墉而祭答陰也祭用甲  
日木生之始也凡社建于外朝西周禮小宗伯掌建  
國之神位右社稷左宗廟考工記云匠人營國左祖  
右社郊特牲云社所以神地之道地載萬物天垂象  
取材于地取法于天是以尊天而親地教民美報  
焉又曰唯社事單井里唯爲社田國人畢作惟社丘  
乘供粢盛又曰君親誓社以習軍旅故賞則告于祖  
刑則借于社祖陽爲生社陰爲殺凡此皆立社之成  
事可說者也孟子云社稷爲重君爲輕諸侯危社稷



則變置曲禮云君死社稷社稷與宗廟等人主尊夫  
親地人生尊父親母天一而已故惟天子祀天而土  
則隨人皆有猶母之親也諸侯土一國大夫土一邑  
士庶人土一廛無人無土故無人不社是以唯社事  
盡里唯社獵畢作惟社祭衆皆供百昌生于土歸于  
土萬物藏于坤役于坤故社者衆之所聚羣心之所  
同是以動衆講武于社人民所依邦國之基故諸侯  
之寶三土地爲先社稷存君存社稷亡君亡魯自三  
家專政公室日卑季友始生桓公使楚丘卜曰男也  
名友在公之右間于兩社爲公室輔季氏亡則魯不

昌言魯不昌在季氏也。定公六年。陽虎將叛。盟公及三桓于周社。盟國人于亳社。詛于五父之衢。大夫分公室。陪臣執國命。哀公孤立。國事已去。宗社如朝露。語曰。涓涓不息。流爲江河。凡此皆事之遂而可諫者也。古王者革命以亡國之社。歸而置諸太廟門外。諸侯分封。皆令設之以示戒也。國社則有壇位而無宮室。公羊傳曰。亡國之社。則奄其上。柴其下。奄其上。不通陽。柴其下。不通陰。以絕生物之功也。郊特牲曰。亳社。北牖。使陰明也。又曰。喪國之社。屋之。周禮秋官土師職。祭勝國之社。稷則爲尸。社尸用刑官。亦以其無

生物之德也。國社在朝門西，亳社在朝門東。故魯外朝東西兩社，楚丘謂開于兩社是也。哀公四年六月，亳社災，君亡之兆。此皆往事之可咎者也。解者云：事成不可說，遂不可諫，往不可咎，非聖人之意。

社主植木，古今同也。周禮大司徒職設其社稷之壇，而樹之田主，各以其野之所宜木，遂以名其社。與其野，卽松柏栗之類。夏社在安邑，殷社在豐鎬，地異而二木無地不宜。獨取松柏者，謂其爲百木之長，歲寒不彫，此義人易曉也。而周獨用栗，故世俗有使民戰栗之說。何休云：松者，容也。想其容貌而取人正，柏近

也親而不遠取地正栗乾戰取天正其附會皆此類  
況國社在朝必刊木爲主如虞主用桑練主用栗之  
類左傳陳侯擁社見鄭子產亦擁其主耳軍行載社  
主豈載其樹與

問社不及稷者稷從社穀從土生與社同祀天子王  
社諸侯侯社此無預農事不設稷主惟大社國社爲  
民祈穀報賽乃祀稷與社同土穀有功德于人人盡  
其道以報之祭者人道故用人爲主句龍主社棄主  
稷皆事之以人也鄭玄輩專執人鬼論造化人者造  
化之靈鬼神之會先王祀天地百物皆以人之有功

德于其物者爲主亦猶隨土所宜木爲社云爾儻句  
龍卽是社則松柏栗亦卽社矣句龍棄死爲社稷當  
其未死世遂無土穀邪○白虎通云夏揖讓于君故  
稱后殷周爲人所歸往故稱人

宰我孔子弟子名予史記謂宰我爲臨淄大夫與田  
常作亂夷其族孔子恥之索隱云春秋傳無宰我與  
田常作亂之事予時有闕止者亦字子我與常爲左  
右相爭權見殺誤以爲宰我耳然呂氏春秋亦云陳  
恒攻宰予于庭韓非子難言篇亦云宰予不免于田  
常是田常殺宰我信也蓋宰我仕齊爲簡公死節如

仇牧之死于宋萬賢于子路之死孔惺也夫子請討  
陳恒師弟同讐之誼而馬遷承訛不思宰我既與常  
作亂常何爲夷滅之如謂齊人惡其助常宰我滅矣  
常獨免乎是時齊人知有常誰敢問常之黨者且死  
難與作亂相懸也列傳李斯短趙高于二世云田常  
爲齊簡公臣下得百姓上得羣臣陰取齊國殺宰子  
于庭遂弑簡公此亦史遷筆何前後相矛盾邪

史記云松柏爲百木長而守宮閭○松葉如針柏一  
名桧雜記云暢曰以桧其性堅氣香鑿爲臼以搗鬱  
草和鬯酒也桧桧通合手曰掬柏葉側生俗謂側柏

又名合掌柏○松柏種類殊松身柏葉曰檜又曰栝  
俗名團柏柏身松葉曰榧俗名刺柏檜葉與身皆曲  
榧葉與身皆直文字會意榧以直從檜以曲會

子曰管仲之器小哉或曰管仲儉乎曰管氏有三歸官  
事不攝焉得儉然則管仲知禮乎曰邦君樹塞門管氏  
亦樹塞門邦君爲兩君之好有反玷管氏亦有反玷管  
氏而知禮孰不知禮

器小謂量淺儉撙節也或人疑器小爲儉是以吝嗇  
當器小也三歸娶三姓女婦人謂嫁曰歸諸侯一娶  
九女一國嫁女二國媵之謂之三歸或云三歸臺名

然則如後世章華銅雀之類與官家臣事職事攝兼也禮大夫不具官故一人兼數事管氏內多匹寵外多冗臣不儉可知或人以爲知禮以奢爲禮也邦君諸侯也樹屏也卽今蕭牆一名浮思塞蔽也蔽內外也禮天子外屏諸侯內屏大夫以簾士以帷坵閤物之具猶今几案之類置之兩楹間獻酬飲畢則反爵於其上亦諸侯之禮管氏僭之氏猶家也國曰姓家曰氏古天子祚土則賜姓後世世官則賜氏氏者列而稱之也

明德親民治國平天下大學之道也世上功名榮寵



由大虛分量視之只如一點浮雲所以堯舜爲天子  
茅茨土階有天下而不與乃謂大器管仲學術不正  
源本不清倚仗功名立基相齊之業纔幹辦一個富  
強便自滿足由其器小故設施不廣容受不宏於是  
有三歸具官反坫樹塞之事奢侈敗度正其器小而  
易盈聖人一言蔽之而或人世俗之見儉本美節以  
擬器小是未知儉也奢犯禮以擬知禮是未知禮也  
器小之故竟不能問夫子亦竟不言要之在其中矣  
管仲相桓夫子嘗稱其功而獨小其器乃知功名易  
立德量難充雖有周公之才驕吝亦無足觀易曰

而光謙兼也。兼則能受管仲之器。可小知而不可大受。故其功烈亦卑。夫子稱其仁。不沒其善。成人之美焉耳。要之器小。其定論也。子貢子路曾西孟子皆深契夫子之旨。世儒大管仲。故高桓文。誣春秋。獎五霸。所由來也。

國策云。齊桓公宮中女市。女閭七百。國人非之。管仲故爲三歸之家。以掩桓公。非自傷于民也。韓非云。桓公使管仲有三歸之家。故漢書亦謂管仲身在陪臣。而取三歸。則三歸爲取女是也。而說苑謂管仲築三歸之臺。以自傷于民。按一統志。三歸臺在東平州東。

阿縣古阿邑也。去臨菑遠。考之春秋。阿本衛邑。齊桓與魯莊公同時。莊公六傳爲襄公。襄公十四年。孫林父敗衛侯于阿。是時阿猶在衛也。其後齊威王烹阿大夫。在衛亡後。管仲時築臺于衛地。何爲故東阿之三歸。妄也。或云卽臺門。禮器云。天子諸侯臺門。以高爲貴也。謂築臺而屋其上。爲門歸。歸然高大貌。門必三。謂左右中三面歸向。天子諸侯之制。郊特牲云。臺門而旅樹。反坫。大夫之僭禮也。禮運云。大夫具官。是謂亂國。官事不攝。是具官也。與樹塞反坫皆奢僭之事。坫以閣物。在堂下。東西南隅築土爲之。如士冠禮

爵弁皮弁繼布冠各一匱。執以待于西。坫南是堂下西南隅也。又旣夕記云。設枌于東。堂下南順齊于坫。是堂下東南隅也。坫有在堂上者。以木爲之。如大射禮。小射正取公之決。拾于東坫上。率射小射正以筭受決。拾退奠于坫上。是也。明堂位云。反坫出尊。崇坫康圭。天子之廟飾也。古者兩君相見。必于廟。尊于兩楹間。反爵之坫在尊南。故曰出尊。又其南設高坫。安置君圭于上。曰崇坫。又房中度食之閣。亦謂坫。皆木也。坫。奠也。所以奠爵。或云高八寸。足高二寸。蓋豐類。古人飲饌。席地故設坫。以奠爵。鄉飲酒燕禮獻酬畢。

皆反爵于堂下。篚內惟兩君相獻酬。則反爵于堂上之坵。今俗酒盞盤亦謂坵。制異而義同。爾雅坵謂之坵。俗呼小方几爲杌。音與坵近。

按史管仲齊大夫名夷吾。穎上人。少善鮑叔牙。叔牙事公子小白。管仲事公子糾。及小白立爲桓公。殺公子糾。管仲囚。鮑叔進管仲。仲旣任齊政。以區區之齊在海濱。通貨賄。設輕重九府。積財富國。彊兵與俗同好惡。其言曰。倉廩實而知禮節。衣食足而知榮辱。上服度則六親固。四維不張。國乃滅亡。下令如流水之原。令順民心。故論卑而易行。俗之所欲。則予之。俗

之。因而去之。其爲政也。善。因禍而爲福。轉敗而  
爲功。故曰。知與之爲取。政之寶也。諸侯由是請齊  
公。遂以霸。管氏亦有三歸。位在陪臣。富于列國之君。  
齊人不以爲侈。有管子書八十六篇。行于世。○禮記  
子云。管仲饒簋而朱紘。旅樹而反坫。山節藻梲。賢  
大夫也。而難爲上也。晏平仲祀其先人。豚肩不揜豆。  
賢大夫也。而難爲下也。君子上不僭。上下不偪。下言  
晏子陋。而管子奢也。

子語魯大師樂曰。樂其可知也。始作翕如也。從之純  
如也。皦如也。繹如也。以成。

大師樂官之長時魯禮樂崩壞舊典散佚哀公十一年夫子自衛反魯正樂當時疑古樂不復可知故夫子語以聲音自然之節始作謂金奏時翕合也衆音翕然齊鳴也從隨也繼也隨始作翕如之後繼作不間歇也純和也衆音諧和記云五采成文八音從律純然如出于一也純則似混同不分數分明也高下清濁皦然明白各不相掩皦則似間斷不屬繹聯屬也周旋條達貫串不斷也樂終曰成樂本樂成也故曰成于樂以成謂以此完成無他術也此理易簡大

師所知中和性情之道聲音之本亘古常存蓋人心

和平今樂猶古人而不仁雖古樂何爲以成二字含  
蓄六代帝王所以象功昭德移風易俗動天地而感  
鬼神者其聲音節奏不過如此所謂大和元韻在八  
心者也樂云樂云豈累黍比竹之器差分正餘之數  
云爾乎凡聖人以道覺人皆從可知可能造端此語  
大師樂可知與告子張禮百世可知正同解者深求  
與聖意相左淺言之又枯索無味皆非也

樂有五音十二律周禮大師掌六律六同以合陰陽  
之聲陽聲黃鐘大簇姑洗蕤賓夷則無射陰聲大呂  
夾鐘仲呂林鐘南呂應鐘皆文之以五聲宮商角徵



羽皆播之以八音金石土革絲木匏竹○律歷志云律有十二陽六爲律陰六爲呂黃帝之所作也黃帝使伶倫自大夏之西昆侖之陰取竹之解谷生其竅厚均者斷兩節閒而吹之以爲黃鐘之宮制十二簫以聽鳳凰之鳴其雄鳴爲六雌鳴亦六以比黃鐘之宮而可以生之是爲律本○漢書注云律率也聲之管也聖人本陰陽別風聲審清濁而不可以文載口傳于是鑄金作鐘以主十二月之聲鐘難分別乃截竹爲管謂之律律者清濁之率法也聲之清濁以管之長短爲制○管之長短以陰陽損益隔八相生陽

損陰益損者下生爲陰益者上生爲陽損益皆以三  
分之一爲度陽成于三呂從乎律也管之參差有等  
則聲之高低相應律呂十二陰陽相間以配十二月  
陽六律始黃鐘爲十一月大簇爲正月姑洗三月蕤  
賓五月夷則七月無射九月陰六律大呂十二月夾  
鐘二月仲呂四月林鐘六月南呂八月應鐘十月故  
律與造化通也律者聲也單吹爲聲聲比爲音音最  
大而沈濁者爲宮最細而輕清者爲羽大次于宮者  
爲商細次于羽者爲徵居四者之中爲角是爲五音  
五者天地之中數聖人言樂不及者器數有專工藝

成而下者也。世俗言樂鐘鼓管籥而已。所謂樂其可知者。道在邇而求諸遠也。

魯國姬姓侯爵。成王封周公元子伯禽于魯。在徐州境。古奄侯之墟。今山東兗州府曲阜縣是。周都豐鎬。距東海遠。奄徐屢叛。故周公太公皆東封。東諸侯倚重焉。

儀封人請見。曰。君子之至於斯也。吾未嘗不得見也。從者見之。出曰。二三子何患於喪乎。天下之無道也久矣。天將以夫子爲木鐸。

儀衛邑。封人守封疆之吏。夫子過而封人求見。自言

已素不爲君子所棄。因以求通。委曲謙遜。殆賢者也。  
故從者爲紹介。入見出而嘆服。識鑒過人。遠矣。夫位  
去國曰喪鐸。大鈴也。木舌曰木鐸。金舌曰金鐸。金鐸  
司馬行軍執之。木鐸國有大戒。振之以徇行道路。警  
衆聽也。尚書胤征曰。每歲孟春。道人以木鐸徇于路。  
月令仲春。先雷三日。奮木鐸以令兆民。周禮小宰。小  
司寇等職皆用之。言上無明君。天將使夫子周流四  
方。振聲教。徇行天下。如天之木鐸云爾。

父母亡曰喪。失位去父母之邦亦曰喪。故孔子去魯  
曰遲遲吾行去父母國之道也。檀弓有子問于曾子

曰問喪于夫子乎曰聞之矣喪不如速貧之愈也與此喪同曲禮大夫士去國踰竟爲壇位鄉國而哭素衣素裳素冠微緣鞶屨素纂乘髦馬不蚤鬐不祭饔不說人以無罪婦人不當御三月而復服皆用喪禮也○胡人通華言者云怯里馬赤猶中國云譯史也元世祖嘗問孔子何如人或對曰是天的怯里馬赤用封人木鐸意世祖深善之

儀卽今河南開封府儀封縣有儀封村在蘭陽縣西北二十里卽封人請見處○周禮司徒有封人掌爲畿封而樹之畿上有封若今之墩界其職掌社稷之

壙造都邑之封域左傳潁谷封人祭仲足爲祭封人  
宋高哀爲蕭封人皆國之邊邑職典封疆然周禮司  
馬又有掌疆之官列掌固司險之後蓋辨疆界則封  
人防禦則掌疆也

子謂韶句盡美矣又盡善也謂武句盡美矣未盡善也  
盡美言其聲容可觀可聽此樂之文也盡善即可觀  
可聽之中一則清明廣大泰和元氣一則發揚蹈厲  
微妙和平此樂之情也凡樂象成王者功成樂作功  
大者樂備舜受終文祖四覲羣后分命九官十二牧  
時亮天工庶績咸熙奏之聲容盡美也武王伐商八

百諸侯會同牧野一陳崇朝清明櫜弓戢矢訪道求  
賢奏之聲容亦與韶並美也但韶樂氣象雍容如天  
覆地載武樂壯厲而少融化故有盡善與未盡善之  
分非評功德評樂也而功德隱然言表武王功德視  
舜自不無少讓

韶紹也繼也繼堯也從古聖神莫如堯舜二聖相繼  
夫子所謂唐虞之際也故古書二帝同典五臣合謨  
明良喜起元首股肱一體無二故舜名重華樂曰韶  
以此也春秋傳云止戈爲武卽詩云邊劉之意邊劉  
者止殺也武王偃武故曰止戈止與繼名義不同而

樂殊韶武難親詩書具在虞書臯謨之末載夔典樂  
鳴球琴瑟下管鼗鼓祝敔笙鏞其器也鳥獸嗃嗃鳳  
凰來儀其舞也帝庸作歌臯陶賜言載賡其歌也乃  
其所爲美善者不在樂而在明良喜起工熙事康讀  
虞書君臣師師濟濟都兪吁咈無非美善之聲容而  
韶可知也武樂載在周頌與樂記夫子告賓牟賈曰  
武始而北出再成而滅商三成而南四成而南國是  
疆五成而分周公左召公右六成復綴以崇天子此  
武舞之容也春秋傳云武之卒章曰耆定爾功今周  
頌武是也其三曰鋪時繹思賚是也其六曰綏萬邦



屢豐年。桓是也。又有賚般酌等篇。不定何章。皆武之樂歌也。讀其辭。有奮揚振作。撥亂反正之思。故夫子曰。總干山立。武王之事也。發揚蹈厲。太公之志也。以爲武王諱。而其未盡善。亦可知也。

子曰。居上不寬。爲禮不敬。臨喪不哀。吾何以觀之哉。寬。敬哀皆一片真心。爲居上行禮臨喪之本。無此真心。雖條教號令之施。威儀進反之容。衰麻綈踊之數。祇似浪花浮草。何以觀之。觀上欲觀其仁。觀禮欲觀其敬。觀喪欲觀其哀。今作者全無實意。觀者何所視。倣只如看傀儡耳。朱註謂觀得失。何得之有。

上爲衆所歸。故以仁爲本。寬裕溫柔。乃是有容。此天地之大德。人不忍之良心。皐陶陳九德。寬爲首。中庸贊至聖。聰明睿智十二德。亦寬爲首。凡爲家國天下之主者。先有寬仁之度。然後衆有栖泊。行政治民。一切畱有餘。不盡如省刑罰。薄稅斂之類。恬養休息。不苛不煩。不傷不害。使民安生樂業。禮樂刑政皆由此。達究其至。雖殺之勞之。而民不庸不怨。乃見上之寬。若夫私恩小惠。沾沾煦煦。姑息廢弛。而教化不興。民生養不遂。見小欲速。又何足以爲寬乎。

三事似皆主在上者言。禮在上曰爲。在下曰行。以尊

適卑曰臨。哭柩亦曰臨。周禮王弔臨是也。凡言觀者。上下相觀。易曰。臨觀之義。或與或求。視上曰觀。易云。觀國之光。是也。視下亦曰觀。中正以天下是也。